


•sawcuenh•

Ranznden

邻居

□ Luz Vanjeinh / 陆婉珍



Sam

Mbouj geij nanz, Luz Swnh ra ndaej hong guh lo. De youq aen cangj rog singz baihnanz hwnjban duenh seizgan he, hix siengj banhfap bang Hij Gangh haeuj cangj bae hwnjban. De naeuz ra seizgan gaisau Hij Gangh hawj fucangj cangj guenj ciu vnz raen baez he, gwn donq caz he.

Ciuq sibgvenq bonjdieg, yienz-naeuz gangj dwg gwn caz, gizsaed dwg bae dan siuyeh baij geij aen daiz iq seiqfueng he, daihgya humx naengh itheij, geij deb cehgve, dangznohmak, mak soemj, raemxmak, ceuj duzsae caeuq baenz roix baenz roix huq gangq, ndi geij daj laeujbizciuj couh gwn lo. Daihgya miz gangj miz riu, maz ngamj gwn couh gwn, doq gwn doq cimax roxnaeuz dwkbej guhaemz, soengswt youh nauhyied. Cungj dan siuyeh neix hai ndaej rim gai rim hongh. Neix dwg cungj fuengsik doxgyau ceiq hwng ndaw singz, bouxlaux bouxcoz cungj ngamj.

Haemh haenx, Hij Gangh cingj hek, Luz Swnh cingj fucangj cangj okdaeuj, baihlaeng lij gaen miz dabsau gyaundeideu dem.

Fucangj cangj gaisau naeuz: “Dah neix dwg Liuz cujyin, gou okdaeuj seiz ngamq bungz de roengzban, couh iu de caez daeuj lo.” Song bouxcoz cungj angqvauvau. Hij Gangh baez yawj dah neix simva couh hai lo, gag ngeix: Danghnaeuz ndaej haeuj cangj neix guhhong, youh aeu ndaej dah coengmingz gyaundeideu neix guh youx, couh baenz lai lo!

Gwn caz seiz, fucangj cangj hix rox gij eiqsei Hij Gangh. De raen Luz Swnh gaenx guh lauxsaed, nyinhnaeuz baengzyoux de hix wnggai dwg yienghneix, mbouj geij nanz, ndaw cangj ciu vnz, dingjlingz Hij Gangh hix biujyienh gig ndei, ndigah couh raemx daengz mieng baenz, ndaej haeuj cangj bae lo.

Vunz bungz saeh ndei sim hailangh. Saeh neix hawj Laux Hij rox le, couh sikhaek gaj gaeq angqhoh. Hwnjyieng baij cojcoeng seiz, ndaw

bak de lij nambdbed: “Docih cojcoeng baujyouh Daeggangh ra ndaej hong ndei, mbouj you gwn lo! Gouz cojcoeng laebdaeb baujyouh, hawj de vaiqdi baenzranz, hawj raeuz dem bak dem vnz bw!”

Haeuj cangj guhhong le, Hij Gangh couh hainduj gyaepgouz Liuz cujyin, ciengzseiz doxiu de bae dieggayau liuh.

Liuz cujyin naj hoengz ndang sang, couhcinj mbouj daenj haizsang, caeuq Hij Gangh caez byaij cungj sang gvaq de bae. Dah neix yiemz Hij Gangh daemq lai, de maij bouxcoz ndang maengh sangseuq. Baez siengj daengz bouxcoz baenzmbauq haenx, de couh gag launyaenq, naj fwt hoengzfwgfwg.

Hij Gangh raen dah henz ndang riu ndaej baenz dwggayez, dauq laihnaeuz dwg dah neix doiq de simdoengh lo, couh fwt dawz de got haeuj rungj daeuj.

Liuz cujyin doeksaetyat, aek byau de deng got ndaej dingj haeuj aek Hij Gangh bae gig hojsouh. De sikhaek yung mbaq hwnjdaej, suk song fwngz bae doi Hij Gangh, riengjvaiq buetdeuz lo. Cij lw Hij Gangh baux dog ndwn youq laj ndithaemh. Gij ndithaemh daj ndaw fwj camx okdaeuj camz haeuj ndaw sim de, in dangqmaz.

Ngoenz daihngaih, Liuz cujyin hawj Hij Gangh fung saenq he. Hij Gangh laihnaeuz dwg saenqyoux, ndawsim gikdoengh dangqmaz. Gaenjgip mbehai saeqsim yawj—

Daeggangh, duenh neix gou nyinhcaen siengj haujlai nanz, raeuz caen mbouj ngamj. Cingj mwngz vaiqdi doiq gou sou sim, lingh ra dah wng bw!

Mwhhaenx, Hij Gangh lumj deng byaj bag nei, gyad roengz gwnzdieg, daengx ndang mazmwnh liux.

Seiq

Ngoenz gvaq lumj mbin, mbouj rox mbouj nyinh couh daengz seizcou lo. Bi 2000 laebcou ngamq gvaq, aen ranz moq Luz Swnh guh baenz lo. Doengh laeuz neix miz sam fungh song

caengz, mwhde dwg ndaw mbanj doengh laeuz ceiq gyaqciq. Vihliux fuengbient hwnj ranz ci hung haeujok yinh caizliuh, Laux Luz couh doi duenh ciengzcab ndeu bae. Caj ranz sat hong le cij lingh yawj ngoenzndei guh bakgvaengh moq.

Laux Hij raen daengz neix, ndaw hoz youh miz naemj lo. De siengj heuh Laux Luz dawz bakgvaengh moq doengz roengz baihlaj geij mij bae. Aenvih canghsuenqmingh hix gangj gvaq, song bakgvaengh gaen benz ciggak, song ranz yungzheih doxceng, saedceij gvaq mbouj ndaej onj.

Hoeng, gaxgonq Laux Hij gaenq caeg gawq gorengh bae gai, caeuq Laux Luz mbouj doxndei, baenzlawz haibak cij ndei ni? Saeh neix aeu menh guh cij ndaej.

Ngoenz ndeu, ndaw cangj cuengqgyaj, Luz Swnh couh iu gyoengq doengzsaeh baengzyoux daeuj ranz moq gwn ngaiz gwn laeuj, hawj ndawranz dem raeuj.

Siengj daengz daxboh caeuq Laux Hij ngeuxgeuz gvaq, couh mbouj heuh Hij Gangh gvaqdaej, mienx ndaej youh doxceng saetnaj lai.

Mwh daihgya cingq cimax ndoet laeuj ceiq yinxdaeuz seiz, Hij Gangh gvaicang hujdengdeng ndwn youq bakdou naeuz: “O, baenz lo, miz gwn hix mbouj heuh gou bw!” Gyoengqvunz cungj riuhaa, angqvauvau rag de naengh congz caez gwn laeuj.

Sawqmwh, Hij Gangh raen Liuz cujyin hix youq doiqna, caeuq Luz Swnh doxgap gwn laeuj, songde lumj mbouj miz vnz nei miz gangj miz riu.

“Hw! Miz laeuj gwn mbouj heuh gou, vanzlij caeuq Liuz cujyin…… Gou gingqvienz dang de guh lauxdoengz, vanzlij cingj laeuj boizleix dem! Hw! Gou caen dafanz!” Hij Gangh siengj daengz neix fwt ndwn hwnjdaej, hujdengdeng yamq din gvaq ranz bae lo.

Laux Hij raen daeglwg yienghneix dauqma, ndaw hoz hix rox lo. “Caen dwg aen mbwn miz lwgda, gihvei daengz lo!” De aeu yungh daeghuk neix cijndaej lo.

“Hw! Cij rox hozgaed, mbouj rox

fanjdwk, miz maz yungh?” Laux Hij gik Hij Gangh. De laebdaeb naeuz, “de angj hwnq laeuz moq, hangz vnz lai, raeuz couh aeu cien gyaz dou de, yawj songde lij daekeiq lwi?”

Caen dahraix, Hij Gangh sikhaek cung bae rag ok cifanhduj cung daengz henz doi cien, “dung” sing he dingz ci roengzdaej, couh dawz gij cien vang, vang sohsoh “dungdung dangdang” vut roengz cifanhduj bae. Cang rim couh doi bae boeg roengz bakgvaengh ranz Luz Swnh bae, lumj yaek aeu boeg gij simfanz swheij bae nei. Laux Hij doq cit ien doq youq ndaw hoz caegriu.

“Daeggangh, mwngz vihmaz gyaz dou ha?” Daxmeh Luz Swnh gyaegyae hemq naeuz.

“Gou couh yienghneix gyaz dou, heuh lwg mwngz ciengj vnz gou bae?” Hij Gangh gangj sat youh hujdengdeng doiq aen cifanhduj bae rag cien.

Gyoengq baengzyoux doengzsaeh cungj okdaeuj gienq Hij Gangh mbouj ndaej baenzneix guh. De cij ndatheiq cung haeuj ranz bae “dung” sing he gven dou lo. Mbouj geij nanz, daihgya couh laebdaeb gvaengz doi cien haenx okbae lo.

Ngoenz daihngaih, Luz Swnh yaek bae hwnjban seiz, duz ma laux ndeu daj doi cien haenx cung okdaeuj raeuq mbouj dingz. Duz ma haenx fajnaeng duk ndok, byombyatmbat, song da doeddedded, gij heuj ma youh hung youh raez, lumj yaek gwn vnz nei.

“Ma dai mwngz! Luenh raeuq maz? Faexsax moeb mwngz bw!” Luz Swnh sing hung rongx. Duz ma lij “w, w, w……” mbouj dingz.

“Moeb ma lij yawj bouxcawj, ndaek lawz youq gizneix luenh raeuq?” Sing gangj vah daj ndaw bakgvaengh ranz Hij Gangh cien okdaeuj. Luengq dou baihlaeng song da caengz beij duzma engq dwglau.

“Daxboh, gaej nauh lo! Mwngz yied laux yied ngoengqloengz bw!” Hij Gangh daj ndawranz doi danci okdaeuj ndaq Laux Hij.

De youh sing hung maenj duz ma haenx: “Lij miz mwngz, ma baengh bouxcawj! Haeuj ranz bae!” Duz ma sikhaek suk gyaey roengz laeng din, baet diuz rieng ndoqndangndang buetdeuz lo. Cij lw Laux Hij bakajsaengx ndwn youq gizde.

Hij Gangh ga gvaz hamj gvaq danci, “dingjlingj” ngauz lingz song sing, coh Luz Swnh baez ngiengx hangz, yaepda heuh Luz Swnh caez bae hwnjban.

Song bouxcoz itloh gwih danci, byawz cungj mbouj haibak gonq. Luz Swnh hix cumhcug, lau gangj loek.

“Haet neix Liuz cujyin dwk denva naeuz gou nyi, ndwen daihngaih de couh haq daengz ndaw si bae, cingj raeuz caez bae gwn laeuj. Daengz seizde, raeuz caez ok loh bw!”

“W!” Luz Swnh riunyumj youh ngaekngaek gyaey.

Song aen danci lumj ngaeuz nem ndang, vuenheij youh soengswt coh daengngoengz ngamq hwnj gizde gwih bae.

(2 sat)